

Elektroprivreda RS i Elektroprivreda Srbije formirali su zajedničko preduzeće radi realizacije Hidroenergetskog sistema “Gornja Drina”, kojim je predviđena izgradnja tri hidrocentrale u gornjem slivu rijeke Drine - Buk Bijela, Foča i Paunci. U tom preduzeću Elektroprivreda Srbije ima udio od 51 posto, a Elektroprivreda RS 49 posto.

Član Predsjedništva BiH Bakir Izetbegović rekao je u razgovoru za BHRT da se protivi projektu Hidroenergetskog sistema “Gornja Drina” te da će, ako ne drugačije, pokušati ga osporiti putem Ustavnog suda. Izetbegović je kritikovao Srbiju u ovom slučaju i predsjednika Aleksandra Vučića budući da nije konsultovana država BiH u čijoj nadležnosti je vodno blago BiH.

Na protivljenja ovom projektu regovao je i ministar vanjske trgovine i ekonomskih odnosa BiH pozdravljajući potpisivanje zajedničke izjave RS i Srbije o realizaciji projekta.

“Negativne reakcije dijela političke javnosti u Federaciji BiH, kao i pokušaji opstrukcije strateškog projekta Hidroenergetskog sistema Gornja Drina proizvod su nervoze zbog napretka i jačanja energetske sektora Republike Srpske i saradnje sa Srbijom. Ne postoji nijedan objektivni razlog za osporavanje projekta koji se realizuje na korist građana, lokalnih zajednica, Republike Srpske i našeg regiona, niti postoje ustavne i zakonske prepreke da on bude realizovan“, kazao je ministar Košarac.

Košarac je ustvrdio da su institucije Republike Srpske poduzele aktivnosti na realizaciji ovog projekta u skladu sa ustavnim i zakonskim nadležnostima, pri čemu nije došlo do povrede ili odstupanja u odnosu na nadležnosti institucija na nivou BiH, uključujući i Ministarstvo vanjske trgovine i ekonomskih odnosa BiH.

Indikator.ba